

SEFANIA gbouŋ

Ki jiin Sefania gbouŋ na po

Sefania din kpaan Juda niib nan yoo baate ki Yennu tan saa dat ŋamm nan digbann nba kur ki sak u mɔb na tubir, li-i kii tee ki bi nyik bi toonbiit tumu.

¹ Maan nae ki Yennu din tur Sefania, yoo nba ki Amonn bija Josaya tee Juda teeb kpanbar na. (Sefania din tee kpanbar Hesehia booru ni nirɔe. Sefania baa din tee Kusi, ki Kusi baa tee Gedalia, ki Gedalia baa mun tee Amaria, ki Amaria baa tee kpanbar Hesehia.)

Ki jiin Yennu buut daar na po

² Ki Yennu yet a, “N saa biir bont kur nba be tingbouŋ na ni, ³ li nisaarii kur, nan bonkobit, nan nɔɔnii, nan janii. N saa te ki toonbiit damm na n baa. N saa biir nisaarik kur, ki sɔɔ tan kan biar ki mɔk manfoori. Min Yennu-e pak na.

⁴ “N saa dat Jerusalem teeb nan Juda teeb kur tuba. N saa boont binba tan saa joont lej ki jiantir tingbann nba tee Baal na. Sɔɔ tan kan tiar mannteeb nba tuun teenɔ na po gbaa. ⁵ N saa biir binba do ŋei yura paak* ki jiantir ŋmaarik, nan yonnu, nan ŋmaabira na. N bia saa biir binba jiantir min Yennu, ki sent mɔsona a bi sii waan, ŋaan bia sent mɔsona

* **1:5** 1.5 Bi ŋei yura paak, bi din tuu sere.

tingbann Milkom sann ni na. ⁶ N saa biir binba yêt ki ji ki waan, ki bia ki baat n boor ki boi a man ñmakitib na.”

⁷ Daar na pera, ki tee yoo nba ki Yennu saa kar buut paak; li paak, ii ñmin man u tɔɔnn. Yennu tee siire a wun chab u niib ki bin kpib, ki jɔɔn bi datai a bin lekib, ki fat bi faar.

⁸ Yennu yeen a, “Nikpinu daar na ni, n saa dat saakab na tuba, nan kpanbar na bonjai tuba, nan binba kur tokii binba ki waan na tuba.

⁹ N saa dat binba kur jiantir, ki bi jiantu naan binba ki waan na tuba. Bi jaan, ki bia kpi niib, a bin fit gbeen bi tingbandiit nan fatuk bona na.”

¹⁰ Yennu ñamm yet a, “Li daar, i saa gbat mɔni fuur Jaŋ Tammɔkɔkir nba be Jerusalem na po. I saa gbat fabinii, doo na bɔk-paann na po, nan bona biiru fuur, kunkona paak.

¹¹ Yimm nba be doo na tij po na-i taŋi gbat linba na yoo nba, yii mɔ kii fabin man, kimaan kpinkpenta na kur saa kpowa.

¹² “Yoo maŋ ni, n tan saa jii fitire ki lon Jerusalem teeb, ki dat binba ki bi numm gboo bi mɔŋ, ki bi maa bi mɔŋ paak na tuba. Bi yeen bi mɔŋ a, ‘Yennu ki tuun bonŋann koo bonbiiri.’ ¹³ Bi datai saa fat bi mɔkint, ki bia bit bi ŋei. Bi ji kan ban kɔɔ bi ŋei nba ki bi maa na ni, koo ki nyu daan nba nyi tilontii kpaant nba ki bi ko na ni.”

¹⁴ Yennu dajaann na nakin bonchiann, ki baat yian yian. Li daar sii tee datonne, ki kunkɔnkɔnna nba mɔk para na gbaa saa yikin nan jaŋmaanii. ¹⁵ Li tan sii tee wutoor

daare, ki tee daamii daar, ki bia tee par-biir daar, ki tee biiru nan boontu daar, ki tee bunbõncheenn daar, ki tee dachimm nan sayuḡ daar, ¹⁶ ki tee daar nba gbee nan tob naatuna fuur, nan tob kunkõnkõnna nba lek digbanjaana nba møk ditõotii na wuyikinii.

¹⁷ Yennu yet a, “N saa baar nan biirjaann nba nae nisaarii paak, ki te ki sõõ kur-ii turin nan jõõḡ na. Bi tun bonbiir ki turima, ki mõtana bi ji saa kpib, ki bi sõn sii puub nan nyun na, ki nikpeena saa põõk tiḡ na paak.”

¹⁸ Daar nba niḡ ki Yennu wutoor tan saa do na, bi salimpeena nan salimmõna na gbaa tan kan fit tinnib. Ki u wutoor nba tee nan muu na tan saa di tingbõuḡ na kur. U tan saa biir ki kpir boont wunba kur be tingbõuḡ na paak.

2

Baruḡ ki jiin binbeḡ lebitu po

¹ Yimm booru nba ki tiin fei na, lakint man kii mei Yennu, ² ki Yennu sennu nba jiin i kuun nan i biiru po na, nan u wutoor nba di nan muu na, nan daar nba ki u yaa wun wann u wutoor na n fit baar. ³ Jenin man Yennu boor, yimm nba tee sikin-n-mõḡ damm ki be tiḡ maḡ ni kura, ki sak u sennu na. Ii tuun linba took, ki sikin i mõḡ Yennu boor. Li ki gar yimm n tan nyi tubdatu ni, daar nba ki Yennu saa wann u wutoor na.

Ki jiin digbana nba lint Israel tiḡ na biiru po

⁴ Sõõ tan kan biar Gasa doo ni. Askelonn doo saa yaana. Bi saa jii daar bõkire ki ber Asdod nan Ekronn niib, ki nyinnib bi doi ni.

⁵ Yimm Filistia teeb na, i boonta. Yimm nba

be mɔkɔgbiɔŋ na, Yennu pak ki biiriwa. U saa biiri, ki i yenɔkɔɔ gbaa kan biari. ⁶ I tiŋ nba be mɔkɔgbiɔŋ na saa kpant pekpaarbaauk, ki pekpaarii lanbont nan peloi sii be leŋ. ⁷ Ki Juda teeb nba biar ki mɔk manfoa na saa yent i tiŋ maŋ. Bi sii kpaar bi pei leŋe, ŋaan dɔɔ Askelonn teeb ŋei na ni. Bi Yomdaano Yennu sii be namm, ki ŋamm turib nyɔot.

⁸ Yabint Yennu yet a, “N gbat Moab nan Amonn teeb nba sukii n niib na ki laab bi-aŋinbawa, nan baa bia faa parbia, a bi saa fat bi tiŋ na. ⁹ Barmɔnii, min nba tee Israel teeb Yennu nba fo na, n por nan n saa biir Amonn nan Moab tinii, nan maa din biir Sodom nan Gomora doi nae. Bi tiŋ maŋ saa kpant yaaboote, ki sii yɔɔ tee langbent, ki mɔot n pia ki loonir. Ki n niib nba tinn na saa fat bi tiŋ ki yentir.”

¹⁰ Moab nan Amonn teeb nba saa la tubdatu biaŋinbae na, bi dont-n-mɔŋ nan karinbaanii nan sukut nba ki bi sukii Yabint Yennu niib na paak. ¹¹ Yennu saa kɔɔmm jaŋmaanii. U saa biir yenbis nba be tingbouŋ na paak kur, booru kur saa jiantɔ bi tinii ni.

¹² Yennu bia saa kpi Sudann teeb.

¹³ Yennu saa jii u yiikoo ki biir Asiria teeb. U saa te ki Ninefe doo n teen langbent nba kaa nyun. ¹⁴ Li sii tee siaminba ki pei nan nei, nan bonkob-booru nba be kur sii dɔɔe. Fiit sii dɔɔ langbent maŋ ni, ki dɔɔntir li takorii ni ki mɔ, ki nɔɔnbɔnii jak li tammɔi paak ki mɔ. Bi datai saa jii naajiik daat nba ki bi din jii maa na, ki yaat nann. ¹⁵ Linba nae saa tun ki tur doo nba mɔk garuk, ki dukii a u mɔŋ yiikooe

saa tinno na. Ki doo maŋ niib dukii a bi doo nae tee digbanjaann durinya na ni. Li tan sii tee langbente, siaminba ki muuk ni bonkobit sii doo foi. Ki wunba kur gar li po, jaŋmaanii saa sooro, ki wun ŋmat poor.

3

Ki jiin Jerusalem yanboomm nan u tinnu po

¹ Jerusalem boonta, digbanbiiuk nan moyê-tuk doo nba dia bi moŋ niib nan diabiik na.

² Bi ki gbiint, koo ki gaar Yennu kpaanii. Bi ki teen Yennu yada, koo ki boio sommir po.

³ Doo maŋ toontunna yudamm na tee nan yanbora nae, ki li barbuura tee nan kinkata na, bi mək jawuuk bonchiann, ki kan ban tenn kpabiri. ⁴ Ki Yennu sokiniinba na tee faak nan tondamm, ki mannteeb na koon Yenjiantu ŋasaakak jakint, ki lebit Yennu sennu na, ki diar baa loon biaŋinba.

⁵ Ŋaan ki Yennu bia lek daa be doo maŋ ni, ki tuun linba took, ki ki tuun linba bi. Ki sanyiok kur, ki u teen u niib na bi monii. Ŋaan ki leŋ niib nba ki tee popeendamm na tuun biit, ki ki tiin fei.

⁶ Yennu yet a, “N boont digbanmuna, ki biir bi doi; ki bi joona nan bi difoot na baawa. Doi na ji tee langbente, ki sonjara na doo yann, soo ki biari. ⁷ N daan dukiin nan n niib na saa turin jirimae, ki gaar n kpaanii, ki kan tamm maa dat bi tuba biaŋinba na. Ŋaan li daa ki yuur kaawa, ki bi yaan piin bi binbenbiik na.”

⁸ Yennu ŋamm yet a, “Li tee soon; ii guu daar nba ki n tan saa pak biir digbana na. Li tee n lore nan man tikir digbana nan naan yent

ki taamm, ki bin bann n wutoor nba mək paŋ bjaŋinba. N wutoor nba tee nan muu na tan saa di ki boont tingbouŋ na kur.

⁹ “Tɔn, n ji saa lebit digbana na niib dudukit, ki bi sii mei min Yennu kuukɔɔe, bi sɔɔ kan miar yenbis nba be. Bi kur saa sak n mɔbe. ¹⁰ Halii nan n niib nba yat ki be Sudann nawa tan saa baar nan piinii ki turin. ¹¹ Li yoo maŋ, yimm nba tee n niib na ji kan di fei, toonkpeta nba ki i tun na paaki. N saa nyinn binba mək garuk nan dont-n-mɔŋ na kure, ki i ji kan mi yêt n mɔb, n kasii kunkonn na paaki. ¹² N saa te ki niib nba mək sikin-n-mɔŋ nan soon nna binbeŋ na n tuu baar n boor ki lon sommir. ¹³ Israel teeb nba biar ki mək manfoa na ji kan tun biit ki tur sɔɔ, koo ki faar faak, koo ki kpann sɔɔ. Bi sii məkhitire, ki be bi yamani, ki kii tiin sɔɔ.”

Ki jiin kpinkpammuk yaŋ po

¹⁴ Israel niib, ii yiin yanii man, kii yikin nan kpinkpammuk.

Jerusalem teeb, ii mək kpinkpammuk man nan i para kura.

¹⁵ Yennu nyik i tubdatu nawa, u nyinn i datai kura.

Yennu nba tee Israel teeb kpanbar na be nani. I ji daa tiin jaŋmaanii.

¹⁶ Yoo baat ki bi tan saa yet Jerusalem teeb a, “Sayonn doo, daa tiin jaŋmaanii.

I daa te ki li mək kpinkpongbatuku.

¹⁷ I Yomdaano Yennu be nani; u yiikoee teeni nyannu.

U par sii peen i paak,

ki u saa turi manfopaann, u lomm ni.

U sii yiin yanii ki mɔk kpinkpammuk i paak.

18 U sii mɔk kpinkpammuk

nan niib nba tuu di jaamm nae i paak.”

U yet a, “N nyik i biiru ki bia nyinni fei dinu niwa.

19 Yoo baate, ki n tan saa dat binba dia-i diabiik na tuba.

N saa nyinn wobii na kur bi wahala ni,
ki kpen nan binba tee yommii ki be digbangann na.

N saa ŋmant bi fei dinu na ki li ji sii tee jirima,
ki durinya niib kur saa pakib.

20 Yoo baate, ki n saa kpen nan i niib nba yat na,

ki turi sangbenjir, durinya na lokir kur po,
ki yaan te yin mokit.”

Yennu-e pak na.

Yennu Gbouŋ Mɔɔr
Bimoba: Yennu Gbouŋ Mɔɔr Bible

copyright © 2003 Wycliffe Bible Translators, Inc.

Language: Bimoba

Contributor: Wycliffe Bible Translators, Inc.

All rights reserved.

2020-11-16

PDF generated using Haiola and XeLaTeX on 21 Sep 2022 from source
files dated 11 Jul 2022

00d89ba0-4677-52d9-9bc5-aa3d7c5c966d